

Calon pilihan raya diingat tidak langgar peraturan

KUALA LUMPUR 11 Sept. - Mahasiswa yang dicalangkan bagi merebut jawatan dalam Majlis Perwakilan Pelajar (MPP) diingatkan sentiasa mematuhi peraturan universiti dan etika sebagai penuntut universiti.

Timbalan Naib Canselor (Hal Ehwal Pelajar dan Alumni) Universiti Putra Malaysia (UPM), Prof. Datuk Dr. Mohd. Fauzi Ramli berkata, mahasiswa universiti itu yang terlibat dalam pilihan raya kampus kali ini perlu memastikan mereka mematuhi syarat untuk bertanding.

Menurutnya, perkara itu perlu diberi perhatian sewajarnya oleh setiap mahasiswa bagi mengelak timbul masalah sewaktu proses penamaan calon berlangsung di Kolej Kediaman 13.

"Setiap calon perlu memastikan mereka mematuhi peraturan pihak universiti dan tidak sewenang-wenangnya menyalahkan pihak lain jika berlaku masalah berkaitan pencalonan mereka atau sebagainya," katanya ketika dihubungi *Utusan Malaysia* di sini hari ini.

Beliau mengulas mengenai pilihan raya kampus bagi memilih kepimpinan baru MPP bagi sesi 2012-2013 yang akan diadakan pada 20 hingga 25 September ini.

• Pemilihan itu melibat-

Pemilihan itu melibatkan 20 institusi pengajian tinggi awam (IPTA) seluruh negara membabitkan pertandingan antara kumpulan proaspirasi dan promahasiswa.

Selain itu, katanya, penyokong kumpulan mahasiswa yang bertanding perlu memastikan mereka mematuhi syarat berkempen dan tidak menimbulkan sebarang provokasi negatif.

Menurut beliau, mana-mana mahasiswa yang melanggar peraturan di bawah Akta Universiti dan Kolej Universiti (AUKU) termasuk melanggar peraturan kempen pilihan raya kampus boleh dikenakan tindakan disiplin yang tegas.

Katanya, universiti berhak mengenakan tindakan disiplin ke atas mana-mana penuntut yang didapati mencemari proses pilihan raya kampus termasuk yang menerima bantuan pihak luar.

“Kita harap biarlah pilihan raya kampus berjalan secara sihat dan berdisiplin mengikut proses demokrasi tanpa dipengaruhi oleh unsur-unsur yang tidak diingini serta bertentangan dengan peraturan,” katanya.

Menurutnya, mahasiswa perlu bijak memilih calon MPP yang benar-benar menuhi aspirasi institusi pengajian tinggi dan bersedia memikul tanggungjawab mewakili suara penuntut.

Ini kerana katanya, setiap pemimpin MPP mempunyai peranan yang penting sebagai penghubung bagi menyuarakan hasrat dan keperluan pelajar kepada universiti dan kerajaan.